



Bentiaraq Ottosen  
Atassut

UKA 2024/127  
23. Oktober 2024

**Namminersorlutik Oqartussat, Kommunillu sanaartugassanut**  
aningaaasartuutissaanninngaaniit ukiumut 1 %-mik, pisortat sanaartugassaataannut immikkut toqqakanut kusassaanermut aningaaasaliissuteqartalernissaq, kusassaanermilu eqqumiitsuliortunik suleqateqartalernissaq pillugu Naalakkersuisut inatsimmik suliaqaqqullugit peqquneqarnissaannik Inatsisartut aalajangiiffigisassaattut siunnersuut. Sanaartugassani kusassaanermi sanaartukkap silataata, iluatungaatalu kusassarneqartarnissaat matumani pineqarpoq.

(Inatsisartunut ilaasortaq Peter Olsen, Inuit Ataqatigiit)

**Inissiani pisortaqarfiusuni Namminersorlutik Oqartussat Kommuunillu sumiiffimmi kalaallit eqqumiitsuliaannik kusassarneqartartussaatilerlugit pisussaaffeqalernissaat pillugu Naalakkersuisut eqqumiitsuliornermik ingerlatsineq pillugu Inatsisartut inatsisaata allanngorteqquillugu peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Aqqalu C. Jerimiassen, Atassut)

Siunnersuutit marluk assigiingajavissortut uani pineqarput. Allaanerussutigiinnarpaalu qanoq aningaaasalersorneqassanersut. Siunertaq ataasiuvoq, taannalu tamatta isumaqtigisiutigerpasippaput.

Naak Peter Olsenip anersaakkut tarnikkullu nukitorsaataanissaa qitiutikkunaruuaraa uagut Atassummiit eqqumiitsuliorneq aningaaasarsiutitut inuussutissarsiutitullu tapersorsorusupparput. Taperserusupparpulli eqqumiitsuliortunut aningaaasaliineq annertunerusariaqartoq.

Atassummiit pisortat aqutsinerat pisussaaffiliisarnerallu nalinginnaasumik appasinnerpaaffianiittussatut oqaatigiuartarpaput. Taamaattorli uani siunnersuuteqartut isumaqtigingaarpakka. Pisortaqarfiit pisussaaffiltertariaqarpagut nunatsinni eqqumiitsuliortut suliaannik pisisussaatilerlugit.

Ilimagilluinnaralarpara massakkut pisortaqarfiit allattoqarfiini iikkami nivingasut amerlanerpaat kalaallit eqqumiitsuliortut suliarinikuugaat. Taamaattorli una siunnersuut akuerineqariarpat qulakkeersinnaalisavarput siunissami pisiniarnerit, kiisalu pisortat sanaartornerminni eqqumiitsulianik pisiortornissaanni kalaallit suliaannik kusassaanissaat.



Aqqalu C. Jerimiassenip siunnersuutimini ersarissarpaa immikkut aningaasartuuteqartoqassanngitsoq, aamma taanna Atassummiit nuannaarutigaarput aningaasanik nutaanik, innuttaasullu kaasarfiiniit aalleqqeqqaarnata eqqumiitsuliortut suliaannik pisortaqarfii suliffeqarfii iikkani kusassaasoqarsinnaalissammat. Pissutaavorlu qalipakkanik allanillu qiperukkanik kusanartulianik pisortaqarfii pisiniartussanngortillutik, aningaasat atorsinnaatitaariikkatik pisissutigiinnartussaammatigit, pisussaaffeqaannartussaapput sumiiffimmi eqqumiitsuliat – kalaallit eqqumiitsuliaannik pisisussaatitaalernissaat.

Tassa aaqqiissut pitsak. Immikkut aningaasaliinngikkaluarluta eqqumiitsuliortut tapersorsorlugit suliakkerneqallattaarnerulernissaat piviusunngortissagaluarparput. Qanortoq aamma siunissami allanguiniartilluta periarfissaatillugu taamatut aaqqiisarisa.

Atassummiit Aqqalu C. Jerimiassenip siunnersuutaa tamakkiisumik taperserparput, Peter Olsenillu siunnersuutaani sanaartornermut aningaasaliissutiniit 1% eqqumiitsulianut atorneqartalernissaat ammaffigalugu. Inatsimmik allangortitsiinnassanerluta, immaqaluunniit immikkut aningaasaliissanersugut pillugu siunnersuutit taakku marluk ataatsimiitaliamut innersuuppagut.